



**Pareser ba Komisaun B Parlamentu Nasional
kona-ba Proposta Lei Orsamentu Jeral Estadu 2024 ba
Setor Defeza, Seguransa no Negósiu Estranjeiru**

Mahein Nia Lian Nú. 160

11 Dezembru 2023



Photo: Livru Orsamentu Jeral Estadu 2024

Fundasaun Mahein (FM)
Website: www.fundasaunmahein.org
2023

Konteudu sira

Introdusaun	3
Porposta OJE ba Defeza, Seguransa no Negosiu Estranjeiru	3
Ministériu Defeza	4
F-FDTL	5
Ministériu Interior	6
PNTL	7
Ministériu Negosiu Estranjeiru no Kooperasaun	8
Serviço Nacional de Inteligência	10
PCIC	10
Rekomendasaun	12
Bibliografia	13

Introdusaun

Iha loron 21 Novembru 2023 Konsellu-Ministru aprova proposta Lei Orsamentu Jeral Estadu (OJE) ba tinan 2024 ho montante biliaun \$1.95¹ no Governu apresenta ba Parlamentu Nasional iha loron 24 Novembru 2023² no Primeiru-Ministru husu atu halo debate ho karater urjente³. Parlamentu Nasional ho Governu hahu halo audensia públiku ba proposta Lei OJE 2024 iha loron 30 Novembru 2023 no ramata iha loron 5 Dezembru 2023⁴.

Tamba debate ho karater urjente, sociedade sivil la hetan oportunidade atu fahe ninia hanoin kona-ba Proposta Lei OGE 2024. Maske nune'e, liu hosi pareser ida ne'e, Fundasaun Mahein (FM) fahe ninia observasaun nune'e bele ajuda di'ak liu tan Deputadu sira Komisaun B hodi halo desizaun kona-ba Proposta Lei OGE 2024 ba setor defeza, seguransa no negosiu estranjeiru. Liu-liu orsamentu ne'ebé refleta ba nesesidade institusaun defeza, seguransa no negosiu estranjeiru.

Proposta OJE 2024 ba Defeza, Seguransa no Negosiu Estranjeiru

Iha tinan 2024 Governu propoin ba institusaun defeza, seguransa no negosiu estranjeiru inklui investigasaun kriminal ho nia orsamentu hanesan hatudu iha tabela kraik ne'e.

Institusaun	Valor (US\$)
Ministériu Defeza	11,192,358
F-FDTL	35,110,177
Ministériu Interior	16,193,256
PNTL	47,701,715
MNEC	30,279,565
SNI	2,684,182
PCIC	2,211,304

Fonte: Proposta OJE 2024

¹ Komunikadu Imprensa hosi Prezidencia Konsellu-Ministru. *Sorumutuk Estraordináriu Konsellu Ministrus nian iha loron 21 fulan-novembru tinan 2023*. Disponivel iha ne'e: <http://timor-leste.gov.tl/?lang=tp&p=35151>

² Governu Timor-Leste. *Governu entrega Proposta Orsamentu Jerál Estadu tinan 2024 nian ba Parlamentu Nasionál*. Disponivel iha ne'e: <http://timor-leste.gov.tl/?lang=tp&p=35184>

³ Karta hosi Primeiru-Ministru ba Parlamentu Nasional. Disponivel iha ne'e: <https://www.laohamutuk.org/econ/OGE24/Proposed/231123KartaPropostaOJE2024pt.pdf>

⁴ Governu Timor-Leste. *Calendário de audiências públicas sobre a Proposta de Lei do Orçamento Geral do Estado para 2024*. Disponivel iha ne'e: <http://timor-leste.gov.tl/?p=35315>

1. Ministériu Defeza

Ministériu Defeza konsentra iha programa defeza nasional, funksionamentu no dezenvolvimentu institusional, no inkluzo sosial. Ho nia orsamentu ba tinan 2024 Ministériu Defeza propoin ho total US\$ 11,192,358⁵. Hosi total orsamentu ida ne'e fahe ba programa no kategoria sira hanesan tuir mai ne'e.

Tabele 01: Orsamentu ba Ministériu Defeza tinan 2024

Programa/Kategoria	SV	BS	TP	KM	KD	Valor (US\$)
Defeza Nasional	1,135,364	2,598,491		750,000	2,000,000	6,483,855
Funksionamentu no Dezenvolvimentu Institusional	562,167	3,754,264	300,000			4,616,431
Inkluzo Sosial	42,072	50,000				92,072
TOTAL	1,739,603	6,402,755	300,000	750,000	2,000,000	11,192,358

Fonte: Proposta OJE 2024

FM hakarak fahe ami nia observaun ligadu ho alokasaun ba Ministériu Defeza iha Proposta OJE ba 2024. Alokasaun US\$ 2 milloens ba Kapital Dezenvolvimentu iha programa Defeza Nasional, alokasaun ne'e ba "Construção Novas Infraestrutura Defesa e Militar". Maibe, la iha tan informasaun kona-ba infraestrutura saida maka sei konstrui ho orsamentu ne'e. Tamba ne'e hamosu pergunta alokasaun ne'e ba saida los, no Governu presiza klarifika oinsa alokasaun ne'e sei kontribui ba atinjimentu Objetivu Mediu-Prazu programa Defeza Nasional nian, katak "As pessoas de Timor-Leste estão seguras e protegidas contra ameaças externas".

Aleinde atividade ne'ebé menciona iha Proposta OJE 2024, FM hakarak propoem atividade sira ne'ebé ami konsidera estratéjiku tebes no tuir ami nia observaun haree katak sei bele dudu dezenvolvimentu setor defeza no salvaguarda interese estratéjiku Timor-Leste nian. Hanesan temi iha Programa IX Governu Konstitusional nian ba setor defeza, hosi objetivu estratéjiku sira ne'ebé Governu hakarak alkansa iha tinan lima mai, objetivu prinsipal ida maka:

"Revee no atualiza Estudu Estratéjiku Forsa-2020 no defini fali planu ba dezenvolvimentu no konsolidasaun ba Forsa Armada, iha buat ne'ebé presiza to'o estabeselese dokumentu estruturante sira ba Planeamentu Estratéjiku Defeza no Militar"⁶.

⁵ Proposta Orsamentu Jeral Estadu 2024. Volume II-A: Planos Anuais dos Serviços e Entidades do Setor Público Administrativo. Pag. 208-211.

⁶ Programa IX Governu Konstitusional. Asesu iha loron 12 Setembru 2023. Disponivel iha ne'e: <http://timor-leste.gov.tl/wp-content/uploads/2023/07/TT-2023-07-19-Programa-IX-Governo.pdf>

Hanesan iha relatóriu sira dahuluk liu FM rekomenda ona katak Governu presiza halo revizaun ba Estudo Força 2020. Gabinete Força 2020 ne'ebé destaka iha Ministériu Defeza la'os haree deit ba ninia implementasaun maibe presiza mos halo avaliaun ba estudu ne'e rasik kona-ba ninia relevânsia no tenke refleto ba kbi'it orsamentu Estadu nian hodi implementa. Se lae dokumentu ambisiozu ida ne'e ho mehi ne'ebé ass maibe mukit iha implementasaun⁷. Tamba ne'e FM aseita no estudu ida ne'e tenke sai prioridade iha tinan 2024, ami sujere halo revizaun no atualiza estudu ne'e hodi defini fila-fali política ba defeza nasional no planu dezvoltimentu no konsolidasaun ba Forsa Armada.

2. FALINTIL – Força de Defesa de Timor-Leste (F-FDTL)

Iha tinan 2024 F-FDTL konsentra iha programa defeza nasional, funsionamentu no dezvoltimentu institucional ho nia orsamentu hamutuk US\$ 35,110,177 ne'ebé fahe ba kada programa no kategoria sira hanesan iha tabela kraik ne'e.

Tabela 02: Orsamentu ba F-FDTL tinan 2024

Programa/Kategoria	SV	BS	TP	KM	KD	Valor (US\$)
Defeza Nasional		14,378,023		868,000		15,246,023
Funsionamentu no Dezenvolvimentu Institucional	17,464,864	2,349,290				19,814,154
Inkluzoan Sosial		50,000				50,000
TOTAL	17,464,864	16,777,313		868,000		35,110,177

Fonte: Proposta OJE 2024

Husi alokasaun \$14,378,023 iha programa Defeza Nasional kategoria Bens no Servisus, FM nota katak US\$12,920,313 sei aloka ba *catering* (fornesimentu hahan) iha Quartel General F-FDTL (bele hare'e Livro Desenvolvimento Orcamentais (despeza tuir klasifikasaun orgániku no ekonómiku), pájina 94.

FM nota katak OJE 2023 aloka montante ne'ebe besik hanesan (US\$12.35 milloens) ba *catering* iha F-FDTL. Klaru katak F-FDTL nia estrutura la hanesan instituisaun estadu sira seluk, no possibilidade F-FDTL presiza orsamentu ba forneseimentu hahan ne'ebe bo'ot liu. Nune'e mos, wainhira ita kompara alokasaun besik US\$13 milloens ba *catering* ne'e ho orsamentu ba saláriu,

⁷ Fundasaun Mahein (2017). Política ba Setor Seguranga Seidauk sai Prioridade iha Timor-Leste: rekomendasun ida ba kandidatu Presidente República no partidu polítiku sira iha Eleisaun Jeral 2017. Asesu iha loron 29 Setembru 2023. Disponivel iha ne'e: <https://www.fundasaunmahein.org/wp-content/uploads/2017/02/MNL-119-Prioridade-Politika-ba-Setor-Seguransa-022017-PDF-1.pdf>

bele haree orsmamentu salariu US\$16 milloens deit. Maske nune'e, FM hanoin Governu prezisa fo esplikasaun klaru kona-ba alokasaun espesifiku ne'e.

Aleinde kustu espesifiku ida ne'e, FM seidauk hare'e alokasaun ba kapasitasaun F-FDTL iha área sira hanesan komponente naval. Tamba ne'e FM propoem iha tinan 2024 investe no hasa'e kbi'it Komponente Naval F-FDTL nian ba iha defeza, vijilansia, kontrolu no fiskalizasaun ba atividade marítima no portuária iha âmbito Sistema Autoridade Marítima Timor-Leste. Liu-liu vijilansia no kontrolu iha parte tasi-mane Timor-Leste nian hodi prevene atividade ilegal sira hanesan peska ilegal. Iha ne'ebé tuir relatório hosi Ministériu Agrikultura no Peska iha tinan 2022 kada tinan Timor-Leste lakon mais-menos US\$ 300 milloens ba leten hosi atividade peska ilegal⁸.

FM mos sujere kontinua fó treinamentu no hadi'a kapacidade Forsa Armada atu fó apoiu ba populasaun sivil, liu-liu iha tempu dezastre naturais no kazu emerjênsia sira seluk, iha âmbito sistema integradu seguransa nasional nian. Inundasaun tinan 2021 ba kotuk no Covid-19 fó lisaun importante ida, liu-liu envolve Forsa Armada iha situsau sira ne'ebé povu no Nasaun enfrenta hodi fó tulun ba populasaun sira iha kazu dezastre naturais no krize saúde pública. Hodi alkansa ida ne'e, Governu tenke promove mos Komponente Apoiu Aéreo, la'os partisipa deit iha defeza militar país nian no tau-matan ba espasu aéreo nasional maibe partisipa mos iha misoens umanitária hodi apoia populasaun sivil⁹.

3. Ministériu Interior

Iha tinan 2024 Ministériu Interior nia programa maka seguransa nasional no funksionamentu no desenvolvimentu institucional ho nia orsamentu hamutuk US\$ 16,193,256 ne'ebé fahe ba programa no kategoria iha sira iha tabela kraik ne'e.

Tabela 03: Orsamentu ba Ministériu Interior tinan 2024

Programa/Kategoria	SV	BS	TP	KM	KD	Valor (US\$)
Seguransa Nasional	11,106,263	483,275		5,500		12,452,682
Funksionamentu no Desenvolvimentu Institucional	2,561,173	1,170,901		8,500		3,740,574
TOTAL	13,667,436	2,511,820		14,000		16,193,256

Fonte: Proposta OJE 2024

⁸ Relatório Ministério Agrikultura no Peska 2023. Asesu iha loron 2 Outurbo 2023. Dispivel iha ne'e: <https://tatoli.tl/2023/08/25/2018-2021-tl-lakon-ikan-maizmenus-388-1720-tonelada/>

⁹ Programa IX Governu Konstitusional. Asesu iha loron 12 Setembru 2023. Dispivel iha ne'e: <http://timor-leste.gov.tl/wp-content/uploads/2023/07/TT-2023-07-19-Programa-IX-Governo.pdf>

Hanesan temi iha relatóriu dahuluk FM nian kona-ba objetivu estratéjiku sira ne'ebé Governu hakarak alkansa iha tinan lima mai. FM sujere iha tinan 2024 Ministériu Interior halo avaliasaun reeve no atualiza Planu Estratéjiku Seguransa Interna (PESI) 2030, atu nune'e bele ajusta ho dezafiu atual ka ohin-loron nian, iha setor seguransa interna¹⁰.

Iha tinan 2024 aleinde revizaun ba PESI 2030, FM mos sujere Ministériu Interior tau mos prioridade ba elaborasaun ba Política Seguransa Nasional (PSN). Tambasa PSN importante? Tamba PSN hanesan planu, estratéjia, konseitu ka doutrina no dezempeña papel importante ida iha tempu agora no futuru, liu-liu identifika interese sira primordial Nasaun nian no estabese liña orientasaun sira hodi hatan ba ameasa, risku no oportunidade sira ba Nasaun. Normalmente, PSN ninia hirarkia superior liu política seguransa sira seluk hanesan doutrina militar, estratéjia ba seguransa interna no sira seluk ne'ebé trata kestaun sira seguransa iha perspetiva instituisaun ka ajênsia espesífika ruma nian. Nune'e mos PSN diferente hosi política sira seluk tamba ninia objetu, portantu liga ho ameasa sira hosi rai laran ho rai liur¹¹.

FM konsidera PSN nu'udar prioridade boot ida hodi orienta estadu nia programa defeza no seguransa interna no esterna sira hotu. Maibe to'o agora PSN seidak elabora. Nune'e ami konsidera Governu prezisa tau alokasaun orsamentu espesífiku atu dezenvolve PSN.

4. Polícia Nacional de Timor-Leste (PNTL)

PNTL iha tinan 2024 konsentra iha programa tolu hanesan seguransa nasional, funionamentu no dezenvolvimentu institucional no inkluzoan sosial ho nia orsamentu hamutuk US\$ 47,701,715 ho nia detallu iha tabela kraik ne'e.

Tabela 04: Orsamentu ba PNTL tinan 2024

Programa/Kategoria	SV	BS	TP	KM	KD	Valor (US\$)
Seguransa Nasional	37,730,523	2,627,367		2,745,500		43,103,390
Funionamentu no Dezenvolvimentu Institucional		4,213,875	141,950	209,500		4,565,325
Inkluzoan Sosial		33,000				33,000
TOTAL	37,730,523	6,874,242	141,950	2,955,000		47,701,715

Fonte: Proposta OJE 2024

¹⁰ Fundasaun Mahein (2023). Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negosiu Estranjeiru iha tinan 2024. Disponivel ihe ne'e: <https://www.fundasaunmahein.org/wp-content/uploads/2023/10/MNL158%20Komisaun-B-Parlamentu-Nasional%20Tetun%20.pdf>

¹¹ Fundasaun Mahein (2017). Política ba Setor Seguransa Seidak sai Prioridade iha Timor-Leste: rekomendasun ida ba kandidatu Presidente Repúblika no partidu polítiku sira iha Eleisaun Jeral 2017. Asesu iha loron 29 Setembru 2023. Disponivel iha ne'e: <https://www.fundasaunmahein.org/wp-content/uploads/2017/02/MNL-119-Prioridade-Politika-ba-Setor-Seguransa-022017-PDF-1.pdf>

FM sujere iha tinan 2024 Governu preziza kontinua tau prioridade ba Estudu Estratéjiku ba PNTL hanesan temi ona iha PESI 2030. Iha elaborasaun estudu ne'e nian Polisia Komunitária tenke sai nafain filozofia no estratéjia polisiamentu PNTL nian. Nomos polisiamentu komunitária implementa iha nível hotu-hotu unidade, servisu no departamentu PNTL nian. Hosi Estudu estratéjiku PNTL nian introduz nafatin VIP (vizibilidade, Involvimentu no profesionalismu) sai nu'udar doutrina policial no kaer metin nafatin ba ninia filozofia. Nune'e PNTL vizível iha fatin hotu-hotu, envolve comunidade iha asaun sira policial nian no hatan ho profesional.

Nune'e mos Governu preziza kontinua fó formasaun ba membru PNTL iha área violênsia bazeia ba jéneru nune'e membru PNTL sira tenke sensível ba asuntu violênsia bazeia ba jéneru. FM mos sujere iha tinan 2024 kontinua promove polisiamentu komunitária iha prevensaun ba krime no vizível iha comunidade liu hosi atividade sira vizita uma ba uma, enkontru regular ho autoridade lokal no comunidade sira. Nune'e mos patrullamentu hosi unidade no servisu sira PNTL nian iha estrada públiku, fronteira terrestre no tasi hodi prevene hahalok sira ne'ebé potênsia mosu krime no atividade kontrabandu sira ne'ebé liu hosi fronteira rai maran no tasi¹².

Ami mos rekomenda reforsa nafatin Departamentu Tranzitu no Seguransa Rodoviária iha nível nasional no munisipal kontinua vizível hodi implementa Kódigu Estrada hodi prevene asidente trafiku no violasaun sira ba Kódigu Estrada bainhira utiliza motorizada ka kareta. Tuir relatóriu husi PNTL iha tinan 5 ikus ne'e fator ne'ebé kontribui ba asidente trafiku ne'ebé aumenta maka'as iha Timor-Leste 90% mai hosi fator ema ka hosi hahalok ema nian ne'ebé la kumpri ba regras, lano no halai ho velocidade ne'ebé maka'as.

Nune'e mos Governu preziza reforsa servisu informasaun polisia nian ka intelijênsia kriminal liu husi Departamentu Informasaun Polisia (DIP). Liu-liu rekolla no analiza informasaun iha âmbito informasaun kriminal no seguransa interna. Inklui kapasita no mellora kapasidade ajente polisia iha matéria investigasaun kriminal ne'ebé nia natureza kompleksu no organizadu¹³.

5. Ministériu Negosiu Estranjeiru no Kooperasaun (MNEC)

Iha tinan 2024 MNEC sei implementa programa rua maka política externa Timor-Leste no funsionamentu no dezenvolvimentu institucional no nia orsamentu hamutuk US\$ 30,279,565 no fahe ba programa no kategoria sira iha tabela kraik ne'e.

¹² Fundasaun Mahein (2023). Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negosiu Estranjeiru iha tinan 2024. Disponível ihe ne'e: <https://www.fundasaunmahein.org/wp-content/uploads/2023/10/MNL158%20Komisaun-B-Parlamentu-Nasional%20Tetun%20.pdf>

¹³ Fundasaun Mahein (2023). Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negosiu Estranjeiru iha tinan 2024. Disponível ihe ne'e: <https://www.fundasaunmahein.org/wp-content/uploads/2023/10/MNL158%20Komisaun-B-Parlamentu-Nasional%20Tetun%20.pdf>

Tabela 05: Orsamentu ba MNEC tinan 2024

Programa/Kategoria	SV	BS	TP	KM	KD	Valor (US\$)
Política Externa Timor-Leste	11,984,422	11,526,033		764,500		24,274,955
Funsionamentu no Dezenvolvimentu Institucional	3,314,939	2,454,171		235,500		6,004,610
TOTAL	15,299,361	13,980,204		1,000,000		30,279,565

Fonte: Proposta OJE 2024

Ba tinan 2024 FM sujere MNEC hahu diskute no elabora dokumentu importante ida liga política externa Timor-Leste nian maka Livru Mutin Política Externa. Dokumentu ne'e liga mos ho interese estratéjiku Timor-Leste nian iha âmbito kooperasaun bilaterais no integrasaun rejional.

Timor-Leste hanesan membru Observador ba ASEAN, FM sujere reforsa no prepara rekursu umanu iha area estratéjiku sira iha pilar ASEAN nian. Nune'e partisipasaun Timor-Leste iha forum sira ASEAN nian bele iha lian, ativu no kontribui foti desizaun estratéjiku sira ne'ebé bele promove Timor-Leste nia interese no benefisiu ba ASEAN tomak.

Númeru timor-oan servisu iha rai liur kontinua aumenta ba bebeik, tamba ne'e protesaun ba traballador timor-oan sira iha rai liur tenke sai prioridade bo'ot ne'ebé presiza haforsa regra no servisu diplomátiku Timor-Leste nian iha rai liur. Exemplu importante ida maka iha Portugal hasoru difikuldade oin-oin bainhira timor-oan sai vítima ba atividade krime organizadu no kuaze prezensa Estadu nian la iha hodi fó protesaun ba sira. Hanesan mos traballador timor-oan sira iha Reinu Unidu, Canada, Austrália, Coreia do Sul no Japaun, diplomata Timor-Leste tenke vizível hodi fó protesaun ba sira bainhira sira presiza no hanesan direitu ida ne'ebé garantia hosi Estadu.

Nune'e mos kontinua promove relasaun di'ak ho nasaun viziñu sira hanesan Australia no Indonézia ne'ebe opta prinsipiu komum sira, demokrasia no respeito ba direitus umanus. Hanesan mos parseiru sira Xina, Japaun, Corea do Sul, Estados Unidos Amerika, Uniaun Europeia, ASEAN no *Comunidade dos Países de Lingua Portuguesa* (CPLP) kontinua promove nu'udar parseiru estratéjiku hodi apoiu dezenvolvimentu Timor-Leste¹⁴.

¹⁴ Fundasaun Mahein (2023). Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negosiu Estranjeiru iha tinan 2024. Disponível ihe ne'e: <https://www.fundasaunmahein.org/wp-content/uploads/2023/10/MNL158%20Komisaun-B-Parlamentu-Nasional%20Tetun%20.pdf>

6. Serviço Nacional de Inteligência (SNI)

SNI iha tinan 2024 nia programa konsentra iha seguransa nasional no funksionamentu no desenvolvimentu institusional ho nia orsamentu hamutuk US\$ 2,684,182 ne'ebé fahe ba programa no kategoria sira iha tabela kraik ne'e.

Tabela 06: Orsamentu ba SNI tinan 2024

Programa/Kategoria	SV	BS	TP	KM	KD	Valor (US\$)
Seguransa Nasional	716,667	897,913				1,614,580
Funksionamentu no Desenvolvimentu Institusional	389,508	337,594		342,500		1,069,602
TOTAL	1,106,175	1,235,507		342,500		2,684,182

Fonte: Proposta OJE 2024

Hanesan FM deskreve tiha ona iha artigu dahuluk ne'ebé publika iha 19 Abril 2023 no iha tinan 2024 FM kontinua sujere Governu halo revizaun ba kuadru legal no kriaun estatutu pesoal SNI nian nu'udar pasu pozitivu hodi hametin profesionalizmu SNI¹⁵. Nune'e mos hadi'a dezafiu ohin lora nian, liu-liu iha espasu sibernetiku nian tenke investe mos iha inteligênsia sibernetika, liu-liu iha mundu globalizadu ohin lora iha ne'ebé sistema hotu-hotu inklui governasaun nian sai dijitalizadu. Ho nune'e, importante ba entidade seguransa liu-liu servisu inteligênsia presiza adapta-an ho realidade mundu dijitalizadu ida ne'e. Liu-tan ho planu *cabo submarino* ne'ebé sei mai presiza mos kondisaun seguransa ba infraestrutura vital refere¹⁶.

7. Polícia Científica de Investigação Criminal (PCIC)

Iha tinan 2024 PCIC konstantra iha programa rua maka asesu ba justisa no funksionamentu no desenvolvimentu institusional ho nia orsamentu hamutuk US\$ 2,211,304 ne'ebé fahe ba programa no kategoria sira iha tabela kraik ne'e.

¹⁵ Fundasaun Mahein (2023). Revizaun Kuadru Legal Serviço Nacional de Inteligência: Pasu Signifikativu hodi Hametin Profesionalizmu SNI. Asesu iha lora 12 Setembru 2023. Disponivel iha ne'e: <https://www.fundasaunmahein.org/2023/04/19/revizaun-kuadru-legal-servico-nacional-de-inteligencia-pasu-signifikativu-hodi-hametin-profesionalizmu-sni/>

¹⁶ Fundasaun Mahein (2023). Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negosiu Estranjeiru iha tinan 2024. Disponivel iha ne'e: <https://www.fundasaunmahein.org/wp-content/uploads/2023/10/MNL158%20Komisaun-B-Parlamentu-Nasional%20Tetun%20.pdf>

Tabela 07: Orsamentu ba PCIC tinan 2024

Programa/Kategoria	SV	BS	TP	KM	KD	Valor (US\$)
Asesu ba Justisa	1,359,328	433,251		204,106		1,996685
Funshonamentu no Dezenvolvimentu Institusional	4,446	210,173				214,619
TOTAL	1,363,774	643,42		204,106		2,211,304

Fonte: Proposta OJE 2024

Iha tinan 2024 FM sujere Governu halo alterasaun ba *Lei Organização Investigação Criminal* (LOIC) no reforsa fila-fali PNTL iha área investigasaun kriminal. Hanesan FM hakerek ona iha tinan 2022 LOIC ne'e la solusiona polêmika ka rivalidade entre PNTL ho PCIC ne'ebé durante ne'e hamosu diskusaun naruk iha sosiedade Timor-Leste. Razaun prinsipal maka FM haree katak LOIC fó kompetênsia bo'ot liu ba PCIC no hasai tiha kompetênsia sira ne'ebé durante exerse hosi PNTL iha matéria investigasaun kriminal nian. Nune'e mos PNTL bele hala'o deit tuir delegasaun kompetênsia hosi Ministériu Públiku, bainhira iha área jurídiku sira ne'ebé PCIC la existe. Signifika katak PNTL sei konsentra deit ba asuntu sira ordem pública no investigasaun kriminal nu'udar kompetênsia PCIC nian hanesan korpu superior polícia kriminal.

Lei refere aumenta-tan frajilidade institucional no la fó solusaun ba desenvolvimentu institucional PNTL, kestaun ida ne'ebé pertinente no urjente tebes. Lei foun ne'e la valoriza instituisaun PNTL ne'ebé existe desde Timor-Leste hetan independênsia, no hafraku fali PNTL enkuantu haforsa tan PCIC. Tamba ne'e, FM preokupa Lei ida ne'e bele hamosu-tan tensaun no konfliktu entre instituisaun Estadu rua ne'e. Timor-Leste nia experiênsia pasadu hanesan Krize 2006 to'o mai empase política iha 2017-2021, ne'ebé hanorin ita katak konfliktu ka tensaun entre instituisaun seguransa lori risku bo'ot ba estabilidade no seguransa nasional¹⁷.

FM hakerek barak kona-ba PCIC hanesan modelu polícia ne'ebé kopia hosi Portugal (Polícia Judisaria iha Ministériu Justisa nia okos) tamba Timor-Leste nia difikuldade no depende ba asesór internasionál sira. Liu-iu wainhira asesór ne'ebé falta konesimentu kona-ba kontekstu Timor-Leste maka esbosu lei sei kontinua *copy-paste* hosi Portugal ho nasaun CPLP sira. Política ka instituisaun ruma kopia deit husi kontekstu seluk no la adaptadu ba kontekstu Timor-Leste bele provoca frajilidade institucional no hafraku prátika sira ne'ebé eziste ona iha terrenu¹⁸.

¹⁷ Fundasaun Mahein (2022). Kriasaun Lei Organizaun Investigasaun Kriminal La Solusiona Polêmika no Rivalidade entre PNTL ho PSIK. Asesu iha loron 20 Setembru 2023 no disponivel iha ne'e: <https://www.fundasaunmahein.org/2022/07/25/kriasaun-lei-organizaun-investigasaun-kriminal-la-solusiona-polemika-no-rivalidade-entre-pntl-ho-psik/>

¹⁸ Fundasaun Mahein (2023). Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negosiu Estranjeiru iha tinan 2024. Disponivel ihe ne'e: <https://www.fundasaunmahein.org/wp-content/uploads/2023/10/MNL158%20Komisaun-B-Parlamentu-Nasional%20Tetun%20.pdf>

Tamba ne'e FM apoiu programa Governu nian kona-ba reforma no kapasita PCIC ne'ebé ba oin sei tutela hosi Komandu PNTL, ho objetivu atu hametin ninia kapasidade ba asoens kona-ba prevensaun, detesaun no investigasaun. Investe iha laboratóriu no ekipamentu sientífiku no kriminais no reforsa formasaun iha área investigasaun kriminal PNTL nian.

Rekomendasaun

FM rekomenda ba Komisaun B Parlamentu Nasional no IX Governu Konstitusional iha tinan 2024 tau prioridade ba asuntu estratéjiku sira iha setor defeza, seguransa no negósiu estranjeiru. Hanesan elaborasaun, produsaun no aprovasaun ba política seguransa nasional, defeza nasional, política externa no planu estratéjiku seguransa interna nomos estudu estratéjiku PNTL. Nune'e mos reforsa servisu patrullamentu no informasaun PNTL hodi identifika no prevene hahalok sira ne'ebé potênsia mosu krime. Iku liu, reforsa servisu intelijênsia, liu-liu rekolla, analiza informasaun no promove intelijênsia sibernética iha Sistema Nasional Intelijênsia.

Aleinde ne'e, FM husu Komisaun B atu husu klarifikasaun husi Governu kona-ba alokasaun orsamental spesífiku balun liga ho setor defeza no seguransa, liu-liu despeza ne'ebé bele konsidera esesívu ka la refleita ho realidade iha rai laran, ka la fo kontribuisaun klaru ba objetivu institusionál sira.

Bibliografia

- Fundasaun Mahein (2023). Pareser ba Komisaun B Parlamentu Nasional kona-ba Prioridade sira ba Setor Defeza, Seguransa no Negosiu Estranjeiru iha tinan 2024. Disponivel ihe ne'e: <https://www.fundasaunmahein.org/wp-content/uploads/2023/10/MNL158%20Komisaun-B-Parlamentu-Nasional%20Tetun%20.pdf>
- Fundasaun Mahein (2023). Revizaun Kuadru Legal Serviço Nacional de Inteligência: Pasu Signifikativu hodi Hametin Profesionalizmu SNI. Disponivel iha ne'e: <https://www.fundasaunmahein.org/2023/04/19/revizaun-kuadru-legal-servico-nacional-de-inteligencia-pasu-signifikativu-hodi-hametin-profesionalizmu-sni/>
- Fundasaun Mahein (2022). Kriasaun Lei Organizaun Investigasaun Kriminal La Solusiona Polêmica no Rivalidade entre PNTL ho PSIK. Disponivel iha ne'e: <https://www.fundasaunmahein.org/2022/07/25/kriasaun-lei-organizaun-investigasaun-kriminal-la-solusiona-polemika-no-rivalidade-entre-pntl-ho-psik/>
- Fundasaun Mahein (2017). Política ba Setor Segurança Seidauk sai Prioridade iha Timor-Leste: rekomendasaun ida ba kandidatu Presidente República no partidu politiku sira iha Eleisaun Jeral 2017. Disponivel iha ne'e: <https://www.fundasaunmahein.org/wp-content/uploads/2017/02/MNL-119-Prioridade-Politika-ba-Setor-Seguransa-022017-PDF-1.pdf>
- Governu Timor-Leste. *Governu entrega Proposta Orsamentu Jerál Estadu tinan 2024 nian ba Parlamentu Nasionál*. Disponivel iha ne'e: <http://timor-leste.gov.tl/?lang=tp&p=35184>
- Jornada Orsamentais tinan 2024. Disponivel iha: <http://timor-leste.gov.tl/?p=33999&lang=tp>
- Karta hosi Primeiru-Ministru ba Parlamentu Nasional. Disponivel iha ne'e: <https://www.laohamutuk.org/econ/OGE24/Proposed/231123KartaPropostaOJE2024pt.pdf>
- Komunikadu Imprensa hosi Prezidencia Konsellu-Ministru. *Sorumutuk Estraordináriu Konsellu Ministrus nian iha loron 21 fulan-novembru tinan 2023*. Disponivel iha ne'e: <http://timor-leste.gov.tl/?lang=tp&p=35151>
- Governu Timor-Leste. *Calendário de audiências públicas sobre a Proposta de Lei do Orçamento Geral do Estado para 2024*. Disponivel iha ne'e: <http://timor-leste.gov.tl/?p=35315>
- Programa IX Governu Konstitusional. Disponivel iha ne'e: <http://timor-leste.gov.tl/wp-content/uploads/2023/07/TT-2023-07-19-Programa-IX-Governo.pdf>
- Proposta Orsamentu Jeral Estadu 2024. Volume II-A: Planos Anuais dos Serviços e Entidades do Setor Público Administrativo.